

Konigin Wilhemina Kanker Fonds Aruba ta cumpli 46 aña



Eaña aki dia di 4 februari Konigin Wilhemina Kanker Fonds (KWF) a recorda e hecho cu 46 aña pasa e'la keda funda aki na Aruba. KWF su meta ta pa yuda educa e comunidad di Aruba riba con pa preveni y combati cancer.

Servicionan di KWF:

Ta duna informacion na publico na e oficina situa na Spinozastraat;

Ta duna guia sycologico/emocional na nos clientenan;

Ta organisa charlanan y simposio pa asina informa e comunidad tocante e malesa cancer como tambe con pa reduci e riesgo di haya e malesa aki. KWF ta haya hopi peticion pa charla na diferente instancia, hotel, etc. Pa duna e diferente charlanan aki KWF ta depende di su boluntarionan;

Ta dispone di hopi material di informacion manera folders, brochures y booklets. Esakinan ta disponibel den diferente idioma, manera papiamentu, hulandes, ingles y tambe spaño;

Ta duna sosten na momento cu un persona mester biah pa Corsow pa tratamento;

Ta dispone di un coleccion di protesis, bh y badpak pa esnan, cu pa motibo di cancer di pecho, mester di esaki;

Ta duna guia na un grupo di sosten (praat groep) di clientenan di cancer di pecho. Un bes pa luna nan ta reuni pa intercambia nan experiencianan y asina duna forza y estimulo na otro pa sigui dilanti. Na esnan interesa pa participa por tuma contacto cu sra. Yarzagaray na nos centro di informacion;

Ta duna e servicio di cuidu na cas. KWF ta dispone di enfermeronan diploma (verpleegkundigen y ziekenverzorgsters) pa atende clientenan, cu ta den e fase terminal di e malesa di cancer, y cu ta desea di pasa esaki na cas cerca di nan sernan keri. Esnan cu ta interesa pa haci uso di e servicio aki por haci un peticion na nos centro di informacion pa asina por bin na remarca pa ayudo. Por tuma contacto cu sra. Josefa Bareño na telefon: 566-6926 kende ta e coordinadora di e servicio di cuidu na cas.

Pa por duna cuidu na cas ta necesario cierto materialnan. KWF tambe ta dispone di cama special, rolstoel, postoele, boter di zuurstof y otro articulonnan cu por yuda e pacient y famia pa ta mas confortabel na cas.

Ayudo financiero:

KWF no ta ricibi subsidio di gobierno y ta conta

riba donacion y sosten di nos comunidad pa nos por sigui ofrece e servicionan aki riba menciona.

Durante luna di april ta bon conoci den nos comunidad, cu ta luna di colecta fondo pa KWF! Nos ta conta tur aña cu un gran cantidad di boluntario, entre nan gruponan di servicio, pero tambe hobennan cu ta dispuesto pa pone algun ora disponibel pa cana y para den nos cayanana pa colecta placa pa KWF.

Tambe mester menciona cu nos ta ricibi durante aña donacion di diferente compania y persona individual aki na Aruba.

Famia di esnan cu fayece di cancer tambe ta yuda KWF. Esaki den forma di pone un box den misa na momento di entiero di nan ser stima. Esaki ta un forma cu famia ta gradici KWF pa e sosten ricibi. Y pa medio di esaki nos kier gradici nan enormemente pa nan confiansa.

Campañanan di concientisacion

Durante luna di mei mundialmente ta tene e campaña di concientisacion riba humamento. KWF siguramente tambe ta apoya y sostene e campaña di "no huma" y ta duna charla y manda comunicado di prensa pa yuda cu informacion riba e topico aki.

Na luna di september nos a yega di organisa e famoso, y bon concuri tur rond di mundo y na Aruba tambe, "Ride For The Roses".

Esaki ta un bike-tour cu KWF sa organisa hunto cu Arubaanse Wielerbond. Mundialmente luna di october ta enfoca riba prevencion di cancer di pecho. Durante e luna aki nos ta duna atrobe hopi charla, presentacion na television y radio. Tambe e ultimo añanan tin diferente compania hunto cu nan empleadonan ta organisa campaña, caminata, etc., y ta duna e fondo recauda na KWF. Un gesto masha bunita mes y cu sigur ta yuda pa continua cu e servicionan cu KWF ta duna! Gradicimento! Manera semper KWF kier a gradici tur esnan cu di un manera of otro ta yuda nos durante añanan y ta spera di lo sigui conta cu boso apoyo moral y financiero pa e siguiente añanan nos dilanti. KWF pa medio di su boluntarionan ta duna sosten den forma di informacion y prevencion, pero tambe na momento cu mester di un man pa yuda durante e momentonan mas dificil, caminda un ser stima ta fayece. E comunidad arubano semper por conta riba e ayudo y sosten di KWF. Pa mas informacion por acudi na e centro di informacion: Konigin Wilhelmina Fonds

Spinozastraat # 9, Tel: (297) 582 0412, Fax: (297) 583 2055.

